

SOLO Di Pueblo Bahul di recuerdo

Connie Yrausquin Reina Hubenil '78 y Reina di Carnaval '81



Nos flamante Reina di Carnaval Connie Yrausquin den compania di su esposo Mr. Allen Burnley y yuinan Lindsay (15) y Matthew (8).



Nos actual Minister Rudy Croes e tempo ey a duna Connie un bombini na nos Aeropuerto Internacional na su yegada di Venezuela, unda Connie a representa Aruba dignamente y a resulta como prome finalista di Miss Playa International 1981.

Den bahul di recuerdo nos ta encontra cu otro esplendoroso reina cu a marca historia den Aruba su Carnaval. Hopi ta e mucha muherman cu ta soña pa konkista un corona como reina. No ta facil pa konkista dos corona, como di Reina Hubenil y Reina di Carnaval. E suerte aki a toca un mucha muher estudiante di Juliana School, den 2^o Mavo cu a bay representa su school dignamente. Tabata reina un tremendo tension bao di e candidatanan na momento cu maestro di ceremonia Ruben Garcia a cuminsa yama nan riba stage pa spera e resultado final. Prins (Shopping) den persona di Armin Maduro y Pancho (Paradise) den persona di Rignald Rafael tambe a cuminsa bula rond di candidatanan riba stage. E roadmarch ganador 'The Meaty' di Lord Boxoe a cuminsa rezona den Wilhelmina Stadion. Ruben Garcia a haci e pregunta na e publico: "Ta kico ta e punto cu un estudiante ta ricibi ora e ta excelente na school? Aki prins

y pancho a bin dilanti cu candidata No.10 cual tabata number di Connie Yrausquin di apenas 16 aña di edad, kende a konkista e corona di Reina Hubenil 1978. Connie ta e ruman mas chikito di e cinco ruman muherman. Su rumanan: Susan, Sandra, Rayza y Joyce ta esnan cu a apoy'e e totalmente. Su bistir a wordo confecciona pa Inchy Kelly di Ponton mientras su peinado y maquiyage tabata bao encargo di Ro Albertz. Ainda Connie ta corda con na momento di a keda eligi como reina, e por a mira e studentenan di school y fanaticonan cu a bin apoy'e, baha for di tribune y bao gritonan di alegria acercando e stage. E bel di school a wordo presta pa apoya Connie. Den e momento di alegria batiendo e bel un estudiante accidentalmente a dal otro estudiante cu bel den cabez. Danki Dios cu esaki no tabata nada di gravedad.

Connie como Reina di Aruba su Carnaval

Connie awor cu mas experiencia ta haya e oportunidad pa bay representa Club Scaramouche den eleccion pa Reina di Carnaval. Venta di entrada pa stadion tabata wordo bendi na e cas di Linda y Jossy na Beatrixstraat 7, kendenan ta e mayornan di Connie. Cada persona cu cumpra kaarchi a haya un T-shirt di color cora cu e Lip di Scaramouche. Tur

fanatico tabata anhele pa haya e T-shirt pa motibo cu e tabata hopi bunita. E anochi aki Connie a conta cu un gran fanaticada unda cu stadion tabata yen di materialnan di apoyo di color cora. Den e aña aki ya e shownan di cada reina a haci nan entrada. Den Connie su presentacion oficial, Connie a subi pasarella cu 10 mucha homber bisti den toxido y a ricibi un rosa y a baila cu e mucha hombernan un pa un, te na e momento cu el'a yega riba stage. Connie a luci cu su bistir blanco masha elegante mes confecciona pa Yuyu Croes mientras su peinado y maquiyage tabata bao encargo di Elizabeth Bikker. Net algo prome cu 12:00 di mey anochi Roadmarch ganador, "Hail I" di Rastalinda a cuminsa rezona den stadion. Prins (Un biah mas) den persona di Papito Rafael y Pancho (Atrobe) den persona Humprey Obispo a cuminsa bula cu yabi den man rond di e candidatanan riba stage. Na e momento culminante prins y Pancho a bin baila dilanti di Connie Yrausquin, nan a tene su man y trece dilanti como Reina di Carnaval 1981. Connie tabata masha emocionada y no por a contene su lagrimanan di alegria. Mientras Mariana Werleman di Connie Francis Club a resulta como e prome finalista. E momento nan aki ta algo masha special den Connie su bida. Como premio Connie a ricibi un auto Toyota Corolla y un renchi di diamante.

Como Reina di Carnaval tambe Connie a representa Aruba dignamente na Margarita, Venezuela den e certamen di Miss Playa International compitiendo cu 50 pais y a logra e puesto di Prome Finalista. Connie a ricibi un gran aplauso di publico banda di caminda na e momento cu el'a habri parada: parada No. 27 di Aruba su Carnaval riba un carroza hunto cu Marjory Flemming, Reina Hubenil 1981. Connie a traha varios aña na ABN AMRO Bank. Awor Connie ta felizmente casa cu Allen Burnley. Connie ta mama di 2 yiu: Lindsay y (15) Matthew(8). Actualmente nan ta residencia na Kendall na Miami Florida na unda nan ta trahando den nan propio compania "Canterbury Trading" cu ta un compania di import y export. Di parti di tur ruman muher di Connie na Aruba atraves di e distancia aki, nan ta manda un fuerte

abrazo y sunchi pa Connie. Nan ta hopi orguyoso di por ta ruman di Reina Hubenil 1978 y Reina di Carnaval 1981.

